



Լիբանանեան Լուրեր

Պէյրուզ Եկող Ուղեւորներուն PCR Վճարելու Պարտադրանքին Դեմ Չայրոյթի Ալիք



PCR-ի քննութեան պարտադրանքը սկսաւ գործել դեպի Պէյրուզ ուղեւորներուն վրայ: Պէյրուզ վերադարձող բազմաթիւ քաղաքացիներ բողոքներ ներկայացուցին, որովհետեւ նախ ո՛չ բոլոր ուղեւորները միջազգային դրամատնային քարտեր ունին այդ գումարը առցանց վճարելու ապա զայն գանձող կողմը տակաւին կը մնայ անյայտ: Նման գումարի մը պարտադրանքը, որպէս օրէնք սահմանուած չէ Լիբանանի մէջ, բան մը, որ կասկածներու եւ տարբեր տեսակի մեկնաբանութիւններու առիթ կու տայ:

Միջազգային Լուրեր

Երտողան Խորհուրդ Կու Տայ Հայաստանին



Թուրքիոյ Նախագահ Ռեճեպ Թայյպ Էրտողան Հայաստանին խորհուրդ տուած է «ճիշդ գնահատել տարածաշրջանին մէջ երկարաժամկետ խաղաղութեան հնարաւորութիւնը»: Ելոյթ ունենալով Անգարայի մէջ ԵՄ երկիրներու դեսպաններու հետ հանդիպման ժամանակ՝ Էրտողանը ուշադրութիւն հրաւիրած է Հարաւային Կովկասի մէջ տիրող իրավիճակի վրայ՝ 2020 թուականի 44-օրեայ

պատերազմի արդիւնքներու լոյսին ներքոյ: Ան անդրադարձած է Երեւանի հետ յարաբերութիւններու կարգաւորման գործընթացի մեկնարկին:

«Որպէսզի ձեռնարկուած քայլերը տան ակնկալուող արդիւնքները, կարեւոր է, որ Հայաստանը ճիշդ գնահատէ տարածաշրջանին մէջ երկարաժամկետ խաղաղութեան հաստատման հնարաւորութիւնը», ըսած է Թուրքիոյ Նախագահը:

Հայկական Լուրեր

ՀՀ ԱԳՆ Յայտարարութիւնը՝ Հայաստանի Եւ Թուրքիոյ Յատուկ Ներկայացուցիչներու Հանդիպման Վերաբերեալ


Մոսկուայի մէջ երէկ՝ Յունուար 14-ին, տեղի ունեցած է Հայաստան-Թուրքիա կարգաւորման գործընթացի յատուկ ներկայացուցիչներ ՀՀ ԱԺ Նախագահի տեղակալ Ռուբէն Ռուբինեանի եւ դեսպան Սերգար Զըրըչի հանդիպումը: Այս մասին կը յայտնէ ՀՀ ԱԳՆ պաշտօնական կայքը:



«Կառուցողական մթնոլորտի մէջ կայացած առաջին հանդիպման ընթացքին յատուկ ներկայացուցիչները իրենց Նախնական մտքերը փոխանակած են Հայաստանի եւ Թուրքիոյ միջեւ երկխօսութեան միջոցով կարգաւորման գործընթացին վերաբերեալ: Կողմերը համաձայնած են շարունակել լիարժէք կարգաւորման ուղղուած բանակցութիւնները՝ առանց Նախապայմաններու: Երկրորդ հանդիպման ամսաթիւն ու վայրը պիտի որոշուի պատշաճ ժամկետի մէջ՝ դիւանագիտական ուղիներով», - նշուած է հաղորդագրութեան մէջ:

«Մեր Տպաւորութեամբ Թուրքիան Կը Կիսէ Հայաստանի Հետ Առանց Նախապայմանի Երկխօսութիւն Սկսելու Մօտեցումը». ՀՀ ԱԳՆ

Հայաստանը կ'ակնկալէ, որ Թուրքիոյ հետ երկխօսութեան գործընթացի արդիւնքով դիւանագիտական յարաբերութիւններ կը հաստատուին Հայաստանի եւ Թուրքիոյ միջեւ, ինչպէս նաեւ կը բացուի երկու երկիրներու միջեւ սահմանը: Այս մասին ըսաւ ՀՀ Արտաքին գործերի Նախարարութեան մամուլի քարտուղար Վահան Յունանեանը: Յունանեան ընդգծեց նաեւ, որ հայկական կողմի տպաւորութեամբ Թուրքիոյ կառավարութիւնը յայտնաւորեց կիսէ առանց Նախապայմանի երկխօսութիւն սկսելու մօտեցումը:



Ըստ Յունանեանի, այդ երկխօսութեան Հայաստանի ակնկալիքները յայտն են, ինչ եղած են 1990-ականներու սկզբներէն ի վեր: «Մենք ակնկալում ենք, որ գործընթացի արդիւնքում Հայաստանի եւ Թուրքիայի միջեւ դիւանագիտական յարաբերութիւններ կը հաստատուեն եւ երկու երկրների միջեւ սահմանը, որը Թուրքիայի կողմից միակողմանիօրէն փակուել էր 90-ականների սկզբին, կը բացվի»:

Յունանեան ըսաւ, որ Հայաստանի եւ Թուրքիոյ յատուկ ներկայացուցիչներու հանդիպումը Մոսկուայի մէջ տեղի պիտի ունենայ ռուսական կողմին հիւրընկալութեամբ: «Ըստ Էութեան, այս առաջին հանդիպումը կրելու է ճանաչողական բնոյթ: Դժուար է ակնկալել, որ մէկ հանդիպման արդիւնքում հնարաւոր կը լինի ունենալ շօշափելի արդիւնքներ, սակայն դրանով կը տրուի գործընթացի մեկնարկը»:

ՀԱՊԿ Հայ Խաղաղապահները Դուրս Կու Գան Ղազախստանէն

ՀԱՊԿ հայ խաղաղապահները Ղազախստանէն մեկնած են հայրենիք, կը յայտնէ Ռուսաստանի Պաշտպանութեան Նախարարութեան մամուլի ծառայութիւնը:

ՀԱՂՈՐԴԱԳՐՈՒԹԻՒՆ

Հունգար Եպիսկոպոսն ու Իր Գլխավորած Պատուիրակությունը Այցելության Տուած են ՄԱՅԵՄ-ի Կեդրոն



Օրերս յատուկ առաքելութեամբ Պեյրոս գտնուող եւ հունգար եկեղեցին ներկայացնող պատուիրակութիւն մը այցելած է Մերձաւոր Արեւելքի Հայ Եկեղեցիներու Միութեան (ՄԱՅԵՄ) կեդրոն:

Ստորեւ կը ներկայացնենք այդ առթիւ հրապարակուած կարճ լրատուութիւնը:

Չորեքշաբթի, 12 Յունուար, 2022-ին, Հունգարիայէն պատուիրակութիւն մը այցելեց ՄԱՅԵՄ-ի Նախագահ վերապատուելի Մկրտիչ Գարակեօզեանին, ՄԱՅԵՄ-ի Կեդրոնական Կոմիտէի Լիբանանի եւ Սուրիոյ անդամներուն, եւ Լիբանանի Հայ Աւետարանական վարժարաններու տնօրէններուն: Հունգարիոյ Աւետարանական Եկեղեցւոյ (RCH) Սիստոի Նախարարական Նախագահ՝ եպս. Չոլթան Պալոկ, ուղեկցութեամբ RCH-ի գլխավոր քարտուղար՝ տիար Անտրաս Կերի, եպիսկոպոսի գործադիր քարտուղար՝ տիկին Տորա Ափելի եւ RCH-ի Տիեզերական պաշտօնէյ վերապատուելի Պալաս Օտորի, յայտնեցին իրենց աջակցութիւնը տարածաշրջանի եկեղեցիներուն եւ ՄԱՅԵՄ-ին, ինչպէս նաեւ քաջալերեցին վերջիններուն իրականացուած քրիստոնէական առաքելութիւնը:

Վերապատուելի Գարակեօզեան պատուիրակութեան նուիրեց Հայաստանէն բերուած գեղանկարչական կտաւ մը, որ կը ներկայացնէ Խաչելութիւնը, առ ի յիշատակ պատուիրակութեան այցելութեան: Պատուիրակութիւնը ՄԱՅԵՄ-ի կեդրոնը այցելելէ ետք այցելեց նաեւ Միութեան Թրատ-Պուրճ Համուտի Քրիստոնէական Ընկերային Ծառալութեան Կեդրոնը, ուր Ընկերային գործերու յանձնաժողովի անդամները եւ անձնակազմը ողջունեցին իրերը: Պատուիրակութեան անդամները մտիկ ըրին յանձնաժողովի Նախագահ՝ պատ. Սեպուհ Թերզեանը, որ խօսեցաւ Կեդրոնի գործունէութեան մասին, եւ թէ այնտեղ ինչ տեսակի կենսական եւ բազմակողմանի օժանդակութիւն եւ զարգացողական ծրագիրներ կը մատուցուին երեխաներուն, մեծերուն, տարեցներուն, ինչպէս նաեւ ընդհանուր համայնքին:

Հայկական Լուրեր

Արցախի Հանրապետութեան ԱԳՆ-ն Խստիւ Կը Պատապարտէ Ազրայէճանի Պահուածքը

Արցախի Հանրապետութեան արտաքին գործոց Նախարարութիւնը հանդէս եկած է յայտարարութեամբ՝ անդրադառնալով Արցախի Հանրապետութեան կարգավիճակին վերաբերեալ Իլիամ Ալիեւի ելոյթին.

«Շարք մը լրատուամիջոցներուն վերջերս տուած հարցազոյցին ընթացքին՝ Ազրայէճանի Հանրապետութեան Նախագահ Իլիամ Ալիեւը, անդրադառնալով ազրայէճանա-դարաբաղեան հակամարտութեան կարգաւորման եւ տարածաշրջանային գործընթացներուն, կրկին օգտագործած է հայատեաց, ապակառուցողական, ծաւալապաշտական բառապաշար եւ գաղափարներ՝ ինչեցնելով անոնց համապատասխանող ծրագրեր ու Նպատակներ:

Նման քաղաքականութիւնը միջազգային իրաւունքի, միջազգային մարդասիրական իրաւունքի եւ ձեռք բերուած համաձայնութիւններու կոպտագոյն խախտում է: Անկախ Նպատակ ունի տորփեղացնելու խաղաղութեան հաստատման ու կայունութեան պահպանման Նախաձեռնութիւններն ու կազմաբանդելու գոյութիւն ունեցող ձեւաչափերը:

Շաբ. Էջ 03



Պատմութեան Մէջ Այսօր

Ֆրիտրիխ Փարոթ

Եոհան Եաքոպ Ֆրիտրիխ Վիլիելմ ֆոն Փարոթ, (գերմաներէն՝ Johann Jakob Friedrich Wilhelm von Parrot, ծնած 14 Հոկտեմբեր, 1791, Զարլսրուէ (գերմաներէն՝ Karlsruhe), Գերմանիա - 15 Յունուար, 1841, Տորփաթ, Ռուսիոյ Կայսրութիւն, ներկայիս՝ Թարթու, Եսթոնիա): Եոհան մասնագիտացած է բնագիտութեան եւ բժշկութեան մէջ, ինչպէս նաեւ եղած է առաջին անձը որ բարձրացած է Արարատին գագաթը (1829 թուականին):

Ֆրիտրիխ ծնած է 14 Հոկտեմբեր, 1791 թուականին, Գերմանիոյ Զարլսրուէ քաղաքին մէջ: Ուսանած է Տորփաթի համալսարանի բնագիտական բաժնին մէջ, ու այդ մէկը աւարտած է ոսկի մետալով: 1811 թուականէն սկսեալ, ուսանող ըլլալով Կ'ուղղուի բազմաթիւ ճանապարհորդութիւններու:

Աւարտելով իր աշխատանքը, Ֆրիտրիխ կրկին կը սկսի յաճախել համալսարան, այս անգամ բժշկութեան բաժնինը: 1814 թուականին կը ստանայ բժշկութեան համալսարանի աստիճանը ու կը ճամբորդէ Գերմանիա բժշկութիւնը ուսումնասիրելու եւ հետազօտելու Նպատակով: 1815 թուականէն սկսեալ աշխատած է ռուսական բանակին մէջ որպէս բժիշկ: Իսկ երբ զօրքերը Ֆրանսայէն վերադարձան, Ֆրիտրիխ կրկին շարունակեց զբաղուիլ գիտա-




կան աշխատանքներով տարբեր քաղաքներու մէջ, օրինակ՝ Պերլինի, Փարիզի, Վիեննայի եւ Միլանի մէջ:

1829-ին եւս չորս ուսանողներուն հետ, որոնցմէ մին Խաչատուր Աբովեանն էր, Ֆրիտրիխ Փարոթը բարձրացաւ Արարատ լեռը, Սեպտեմբեր 27-ին անոնք հասան Մեծ Մասիս գագաթը, որտեղ կատարեցին մի շարք օդերեւութաբանական եւ մագնիսաբանական դիտարկումներ:

- Ֆրիտրիխ Փարոթը նկարագրած է որոշ բուսաբանական թաքսոններ: Անոր անունով կը կոչուի համամեղազգիներուն ընտանիքի (լատ.՝ hamamelidaceae մալակասի՝ hamamelidaceae) Փարոթիա ցեղին բոյսերը (լատ.՝ Parrotia մալակասի՝ Parrotia)՝ որոնց պատկանող պարսկական երկաթածառի լատիներէն անունն է՝ Parotia persica:

- 1935-ն Միջազգային աստղագիտական ընկերութիւնը Լուսինի տեսանելի մասի խառնարաններէն մէկուն կը շնորհէ Փարոթիին անունը:

ՄԱՍՈՒԼԻ ՏԱԿ



Կազմ.՝ Պետրոս Թորոսեան եւ Անդրանիկ Տագետեան
Հրատ.՝ ԹԵԶԵԵԱՆ ՄՇԱԿՈՒԹԱՅԻՆ ՄԻՈՒԹԵԱՆ
Հիմնադիրներու Մարմնի եւ
Ամերիկայի եւ Քանատայի Կեդրոնական Վարչութեան

ՌԱԿ-ի Համադրուած Մամուլ

Նոր Տարուան Սեմին՝ Հայ Ժողովուրդը Լուրջ Պահանջներ Ունի Հայրենիքի Կատասխանատուներէն

ՊԿՏ. ԱՐՇԱԻՐ ԿԵՕՆՃԵԱՆ

Մեր ամբողջ ժողովուրդին սիրտը՝ Հայաստան-Արցախ հայրենիքը, այսօր ենթարկուած է գոյութենական այնպիսի ճակատագրական տագնապի մը որուն հետեւանքով անվիճելի անհրաժեշտութիւն դարձած է ամբողջ ժողովուրդի անունով պահանջներ դնելու հայրենիքի պատասխանատուներուն դիմաց: Որոշ է նաեւ որ օրինական ոչ մէկ ձեւաւորում գոյութիւն ունի որպէսզի ժողովուրդը կարենայ օրինաւոր կերպով արտայայտել իր մեծամասնութեան պահանջները: Ահա այս իրականութեան գիտակից ըլլալով է որ այս յօդուածին որպէս հեղինակ ազատ կզգամ թարգմանը ըլլալու նուազագոյնը մեր ժողովուրդի գիտակից խոշոր **լուր մեծամասնութեան** մտածումներուն, մտահոգութիւններուն եւ անոնցմէ բխած խիստ եւ լուրջ պահանջներուն:

Այս գրութիւնը ուղղուած է, լայն առումով մեր հայրենիքի բոլոր պատասխանատուներուն որ իր մէջ կը պարփակէ բնականաբար առաջին հերթին՝ այսօրուան իշխանութիւնները եւ սակայն ոչ միայն անոնք: Արդարեւ անխուսափելիօրէն պատասխանատուներուն շարքին են նաեւ շատ ուրիշներ: Անոնց շարքին են նոյն ինք Հայաստանի Նախագահը, խորհրդարանական ընդիմադիրները, արտախորհրդարանական բազմաթիւ եւ բազմերանգ հասարակական եւ քաղաքական կազմակերպութիւնները, յատկապէս անթիւ եւ անհամար կուսակցութիւնները, մտաւորական ամբողջ վերնախաւը, եւ ի վերջոյ՝, ի հոգեւորս, նաեւ Հայաստանեայց Առաքելական Եկեղեցին իր աւագ հոգեւորականներով գլխաւորութեամբ Ամենայն Հայոց Հայրապետին:

Մեր մայր երկրին այսօրուան տագնապը գոյութենական է: Վտանգը մեր բազմադարեան հայրենիքը կորսնցնելու ճակատագիրն է: Ճգնաժամային ահազանգը հնչեցնելու ժամը հիմա է եթէ արդէն իսկ ուշ չէ: Երբ անխուսափելի պատահի, այլեւս անօգուտ է այսպանումներ եւ դատապարտումներ արձակելը տարբեր հասցէներու:

Ահա այս փոթորկայոյց խորհրդածութիւններով է որ վերեւը բնորոշուած պատասխանատուներէն՝ մեր ժողովուրդը կը պահանջէ առնել առարկայական քայլեր երեք ուղղութիւններով:

Առաջին պահանջը ուղղակիօրէն հասցեագրուած է այսօրուան իշխանութիւններուն: Անոնք իրենց կառավարման աշխատանքներուն մէջ տակաւին կարճատեսօրէն կը շարունակեն սահմանափակուիլ առանձնապէս իրենց «հաւատարիմ» նկատած մարդկային բարեկամ ուժերուն վրայ, որոնք ակնյայտօրէն անբաւարար եւ յաճախ անփորձ եւ անկարող են դիմագրաւելու այսօր Հայաստան-Արցախի դիմագրաւած՝ քաղաքական, պաշտպանական, դիւանագիտութեան, տնտեսական, մարտահրաւերները: Իշխանութիւններէն կը պահանջուի օգտագործել հայրութեան տրամադրելի բոլոր կարող ոյժերը: Առաւել եւս սկսած է պարզուիլ որ իշխանութիւնները, անկարողութենէ եւ յուսախաբութիւններէ մղուած ճնշման տակ սկսած են հակա-ժողովրդավարական քայլերու դիմել, ինչպէս օրինակի համար ոստիկանական ոյժ գործածելով արգիլելով որ օրինաւորապէս ընտրուած քաղաքացին մուտք գործէ իր պաշտօնավայրէն ներս:

Հայ ժողովուրդը բոլորովին անընդունելի կը գտնէ վերեւը նշուած այս վարքագիծը եւ կը պահանջէ իշխանութիւններէն՝ **անյապաղ վերջ դնել** այս գործելակերպին: Երկրորդ պահանջը ուղղուած է վերեւը բնորոշուած լայն առումով հայրենիքի բոլոր «պատասխանատուներուն»: Արդարեւ մինչ իշխանութիւններէն կը պահանջուի ներգրաւել իրենց ներ շրջանակէն դուրս գտնուող կարող բոլոր ոյժերը, նոյնպէս ալ կը պահանջուի այս վերջիններէն իրենց պատրաստակամութիւնը եւ տրամադրելիութիւնը հրապարակաւ յայտարարել եւ ցուցադրել: Անոնք պարտին, ներկայ տագնապայի կացութեան մէջ իրենց տրամադրութիւնը հրապարակաւ յայտնել թէ պատրաստ են կառուցողական եւ գործնական միջոցներով սատարելու օրուան իշխանութեանց:

Ներկայ ճգնաժամային պայմաններուն ճնշման տակ ակնկալուածը ստեղծելն է համաձայնական համախմբուած ոյժերով կառավարման արտակարգ կառոյց մը ուր իւրաքանչիւր բնագաւառի մէջ Հայաստան եւ Արցախ կարենան օգտուիլ երկրի լաւագոյն ոյժերէն, առանց որ արծարծուին արտահերթ

ընտրութիւններու առաջարկներ: Ակնյայտ է որ երկրին այսօրուան քաղաքական ներքին մթնոլորտին մէջ, նոր ընտրութիւններու դիմել կրնայ միայն աւելի եւս բաժանարար եւ քանդիչ հետեւանքներ ունենալ:

Այս կապակցութեամբ, հայրենիքի մտաւորական եւ հոգեւորական վերնախաւէն կը պահանջուի իրենց խօսքերով, կոչերով եւ վերլուծական գրութիւններով, ընդհանուր կառուցողական այս մօտեցումը քաջալերել, դիւրացնել եւ **ի վերջոյ բացայայտ պահանջել**:

Ահա այս երկրորդ պահանջն է հայ ժողովուրդին՝ որ ուղղուած է թէ իշխանութեան եւ թէ հայրենիքի ամբողջ վերնախաւին:

Վերջապէ՛ս հայ ժողովուրդի երրորդ ակնկալութիւնը եւ պահանջը կը վերաբերի ազգային, հիմնական այն խոշոր բացթողումին որ կը կայանայ, այսօրուան գոյութենական ազգային մեծ տագնապին օժանդակելու գործին՝ չկարենալ մասնակից դարձնելը հսկայական տարողութիւն ունեցող հայ Սփիւռքը: Ընդհակառակը այսօրուայ դրուածքով, Սփիւռքի բազմակողմանի կարողականութիւնը (potential) նուազագոյն չափով միայն մասնակից է հայրենիքի փրկութեան գործին, հակառակ իր ունեցած նիւթական, մտաւորական եւ մարդկային հսկայական միջոցներուն:

Կընդունինք թէ Սփիւռքը իր այսօրուան ձեւաւորումով չունի միակտուր ընդհանուր կազմակերպութեան: Սակայն ան անկասկածօրէն ունի փաստուած եւ արդիւնաւետ գործունէութիւն ցուցաբերած՝ բազմաշերտ կազմակերպութիւններ ինչպէս նաեւ արտակարգ յաջողութիւններու հասած անհատներ, որոնց խոշոր մեծամասնութիւնը տրամադիր է օժանդակելու իր մայր հայրենիքին:

Այս հսկայական ոյժը օգտագործելը ի նպաստ մայր երկրին դիւրին գործ չէ, անկասկած: Սակայն այդ աշխատանքը գոնէ մասամբ յաջողութեամբ առաջ տանիլը պարտականութիւնն է պետութեան: Մինչեւ այսօր կարեւորագոյն այս խնդրին՝ անցեալի եւ ներկայի իշխանութեանց մօտեցումը բոլորովին մակերեսային անկատար եւ անընդունելի եղած է:

Մենք՝ սփիւռքահայերս պատրաստ ենք լրջութեամբ օժանդակելու կազմակերպական այս աշխատանքին:

Հայ ժողովուրդի պահանջն է հայրենիքի պատասխանատուներէն այս կապակցութեամբ եւս **առաջնահերթութեան գծին վրայ դնել**, իրատես եւ գործնական քայլեր առնելու պարտաւորութիւնը:

Եզրակացնելով կը կրկնեմ Նախաբանին մէջ արտայայտած վստահութիւնս թէ կատարուած վերոյիշեալ երեք պահանջները արտայայտութիւնն են **հայ ժողովուրդի նուազագոյնը լուր մեծամասնութեան կամքին՝ ուղղուած հայրենիքի լայն առումով բոլոր պատասխանատուներուն**:

Կը խորհիմ թէ պատմութիւնը բարձր գնահատանքով կամ խստութեամբ պիտի արժեւորէ կամ դատէ անոնց իրագործման օժանդակող կամ արգելք եղող ոյժերը եւ անհատները:

«Ապագայ»

Հայկական Լուրեր

ՀԱՊԿ Հայ Խաղաղապահները...

Սկիզբը Էջ 01

«ՀԱՊԿ հաւաքական խաղաղապահ ուժերէն Հայաստանի Հանրապետութեան ստորաբաժանումներու անձնակազմը, որոնք կը կատարէին Ղազախստանի Հանրապետութեան մէջ նշանակալի կառոյցներու պաշտպանութեան խնդիրները, աւարտելով բեռնումը ՌԴ օդատիեզերական ուժերու ռազմական ինքնաթիռներ Ալմա Աթայի օդակայանին մէջ, կը վերադառնան տուն», կ'ըսուի հաղորդագրութեան մէջ:

Արցախի Հանրապետութեան ԱԳՆ-ն...

Սկիզբը Էջ 02

Ազրպէյճանի ղեկավարը յատուկ թիրախ դարձուցած է նաեւ ԵԱՀԿ Մինսկի խումբի համանախագահութեան եւ համանախագահող երկիրներէն մէկուն՝ Ռուսիոյ Դաշնութեան կողմէ Արցախի մէջ իրականացուող խաղաղապահ առաքելութիւնը՝ անհերթեմեղադրանքներ հնչեցնելով անոնց գործունէութեան դէմ: ԵԱՀԿ Մինսկի խումբի համանախագահութեան ձեւաչափը կը հանդիսանայ ազրպէյճանա-դարաբաղեան հակամարտութեան կարգաւորման բոլոր կողմերուն միջեւ համաձայնեցուած միակ ձեւաչափը:

Մենք բարձր կը գնահատենք ռուս խաղաղապահ զօրակազմի առաքելութիւնը Արցախի մէջ եւ անընդունելի կը համարենք անոնց գործունէութեան վրայ ստուեր նետելու ցանկացած փորձ:

Արցախի Հանրապետութեան ԱԳՆ-ն խստիւ կը դատապարտէ Ազրպէյճանի պահուածքը՝ համոզուած ըլլալով, որ պետական մակարդակով իրականացուող այսպիսի քաղաքականութիւնը պետք է արժանանայ համապատասխան գնահատականի նաեւ միջազգային հանրութեան կողմէ:

Եղեռնի Հետքերով - 20

Տեօրթեուցի Պենոն Վասիլեանի Յուշերը Չոր Մերճուման-Չորք Մարգապան

Շար. Նախորդ շաբաթէն

Հասանք հարսնիքի տուն. հարսնիքը դեռ կը շարունակուի կերուխում, երգել-պարել: Աղջիկները գիս տեսան, անմիջապէս պարի քաշեցին, Չպէտէն իմ դէմն ելաւ, սկսաւ հետս պարել: Ամէն մէկ աղջիկ հայ զինուորի մը հետ կը պարէր: Աղջիկ մը եկաւ մեր մէջտեղ մտաւ որ հետս պարէ: Չպէտէն անոր արաբերէն բան մը ըսաւ՝ աղջիկը Չպէտէնին հրեց գետին ձգեց, Հայկարամը միջամտեց, աղջկան բռնեց մէկ կողմ շարեց, ըսաւ՝ «տեղդ հանգիստ կեցիր, հարսնիքը մի խանգարեր»: Աղջիկը լալով դուրս գնաց, Հայկարամը ետեւէն գնաց, ետ բերաւ Չպէտէն ալ ըսաւ՝ «ձգէ թող պարեն»:

Չպէտէն գնաց նստաւ, ես ալ աղջկան քով գացի պարի հրաւիրեցի՝ մերժեց ինծի: Ես ալ քովը նստայ:

- Չիս չէ՞ս հաւնիր, ես անկէ աւելի անուշիկ չե՞մ,- հարցուց աղջիկը:
- Շատ անուշիկ ես, քեզ ալ կը սիրեմ,- ըսի: Այս աղջիկները ամէն ինչ մոռցնել կու տան երիտասարդներուն, կը փակչին հայ տղոց, ազատ չեն ձգեր ոչ մէկ վայրկեան: Միքանի ժամ պարեցինք հարսնիքը վերջացաւ, ամէն մարդ գնաց, մեր ալ երթալու ժամը հասաւ, ելանք երկու թաքսի առինք գացինք գորանոց: Հոս ճարապիւս չէ. եթէ զինուորներս ճիշտ ժամուն պատրաստ չըլլանք՝ կը պատժուինք: Պառկելու ժամը, եղաւ զանգը ինչեց՝ ամէն մարդ անկողին մտաւ:

Ես ալ պառկեցայ բայց աչքերս քուն չի գար: Կը մտածեմ եղածներուն մասին. յանկարծ միտքս եկաւ մայրիկին հարսը եւ սուրճի գաւաթին խօսքերը, թէ՛ «կամքդ պիտի ըլլայ, բայց վերջը ետ պիտի ըլլաս»: Ուրեմն ճիշտ է:

Չպէտէն պատճառով էլմաստէն հեռու մնացի: Չպէտէնին սիրահարելու գիշերը մինչեւ առաւօտ անքուն մնացի: Առաւօտ ելայ Կարաճա օղանին խօսքերը միտքս եկան: Կարաճա օղանը աղջիկներուն կը սիրահարէր, բայց վերջաւորութեան ոչ մէկը բախտ կ'ըլլար կը ձգէր- կ'երթար: Հիմա ես ալ անոր նման եղայ. Ֆաթման բախտ չեղաւ, Էլմաստը աչքէս ելաւ, հիմա Չպէտէն դէմն ելաւ՝ շուարած մնացեր եմ: Մատիտը ձեռքս առի սա խօսքերը գրեցի.

Սիրահարողը ճամփան կը մնայ
Որտեղ մէկ սիրուն՝ գերին կը դառնայ
Մէկը կը թողու միւսը կը գտնէ
Ոչ մէկ սիրած չ'ունենար յաւետ:

«Հանգուցեալ Չարուհիէս ետք այս երրորդ սիրահարիս է, ես զինուոր մըն եմ, մէկ օր հոս, վաղը՝ ուրիշ տեղ, ուրիշ օր մըն ալ չես գիտեր ուր կ'ըլլամ: Ֆրանսացիները տիւրզիներուն հետ կը պատերազմին, թերեւս մեզ ալ կը տանին պատերազմին, հո՛ն կը մեռնիմ կամ ողջ կը մնամ ո՞վ գիտէ ի՞նչ կ'ըլլայ...»: Ես ինծի այսպէս կը մտածէի, վերջաւորութեան ըսի՝ «ի՛նչ կ'ուզէ թող ըլլայ, ես Չպէտէն պիտի չհրաժարիմ, պիտի երթամ ձեռքը պիտի ուզեմ»: Միտքս դրի, Շաբաթ օր *սերճաւէն* արտօնութիւն ուզեցի: Մինչեւ երկուշաբթի առաւօտի արտօնութիւն տուաւ: Շաբաթ առտու ուղղակի գացի Չահլէ, Հայկարամին տունը: Հայկարամին ըսի՝

- Եկուր երթանք, Չպէտէն ինծի համար ուզէ հօրմէն: Եթէ տայ՝ մէկ ամիսէն հարսանիք կ'ընեն: Կ'ուզեմ որ շուտ ամուսնանամ, Բայաքէն տուն կը վարձեմ, հոն կ'ապրիմ: Մեր զինուորներուն շատերը ամուսնացած են, տունը կ'երթան կը պառկին, առտու պաշտօնին կու գան: Ես ամէն ծախսերը կ'ընեմ, զինուորութիւնս վերջանայ՝ Ամերիկա կ'երթանք: Եթէ այսպէս համաձայն ըլլան՝ ես պատրաստ եմ, եթէ չ'ուզեն՝ ինքը գիտէ:

1925 Յուլիսին գացինք Չպէտէնին հօր քով: Հայկարամը խօսքը բացաւ:

- Ինչ անհամբեր մարդ ես,- ըսաւ Չպէտէնին հայրը,- Նախ բարի եկարի սուրճը խմենք, վերջը ինչ որ կ'ուզես խօսէ:- Չպէտէն սուրճը բերաւ ուրախ-ուրախ, ինծի հրամցուց: Ես ալ առի հօրը հրամցուցի, երկրորդը Հայկարամին տուի, վերջը ես առի: Հայրը սիկարէթ հրամցուց:

- Շնորհակալ եմ, չեմ ծխեր,- ըսի:

Ափսէին մէջ տօնական շոքոլա կար, հատ մը առի: Սուրճը խմեցինք, Սելիմ Էֆենտին Հայկարամին՝

- Հիմա ի՞նչ ըսելիք ունիս:

- Ու՛ր է մատամը տունը չէ՞,- հարցուց Հայկարամը: Սելիմ Էֆենտին Չպէտէնին ըսաւ՝

- Պնա՛ մայրդ կանչէ թող գայ, Նայինք մեր Հայկարամ աղան ի՞նչ պիտի ըսէ:-

Չպէտէն շուտով դրացիներուն գնաց մայրը կանչեց եկան: Մատամը բարեւեց մեզ, ես ալ ելայ ձեռքը համբուրեցի: Սելիմ Էֆենտին տիկնոջը՝ հարցուր Նայիմ, Հայկարամ աղան ինչո՞ւ եկեր է, ի՞նչ կ'ուզէ,- ըսաւ: Մատամը՝

- Բարի եկեր էք, հրամէ Հայկարամ աղա, խօսիր տեսնենք,- ըսաւ: Հայկարամը՝ ինչպէս որ իրեն ըսէր Էի, Նոյնութեամբ պարզեց: Սելիմ Էֆենտին Հայկարամ աղային մէկ խօսքը երկու չըրաւ, անմիջապէս ընդառաջեց: Ես Սելիմ Էֆենտին եւ տիկնոջ ձեռքերը համբուրեցի, վերջը Հայկարամին ալ համբուրեցի, Չպէտէն ալ իր հայրն ու մայրը համբուրեց, վերջը Հայկարամին ձեռքը համբուրեց, հայրը աղջկան ըսաւ՝ «Նշանածդ ալ համբուրէ», Չպէտէն քովս եկաւ, ոտքի ելայ համբուրուեցանք, քովս նստաւ: Հայկարամը ըսաւ՝

- Վաղը կ'եսօրէ առաջ Նշան կ'ընենք: Պնա ինչ որ պետք է պատրաստէ:

- Այսօր ամէն ինչ պատրաստ կ'ըլլայ ժամը չորսին, Չպէտէն միասին թող գայ, ինչ որ կ'ուզէ թող հաւնի՝ առնեմ,- ըսի: Մայրը համաձայն եղաւ՝

- Դուն ալ Նշանածիդ մատանին առ,- ըսաւ:

Չպէտէն հագուստը հագաւ, ես ալ արդէն *սերճաւի* զգեստս հագած էի, ելանք դուրս, ձիակառք նստանք, ուղղակի գացինք ոսկերիչի խանութ:

- Չպէտէն, ինչ որ կ'ուզես հաւնիր,- ըսի: Ոսկերիչը միքանի մատանիներ բերաւ, Չպէտէն հատ մը հաւնեցաւ, ըսի՝ մատանի մըն ալ ինծի համար տուր: Ոսկերիչը հարցուց՝

- Ի՞նչ է Նշան մը պիտի ընէք:

- Այո, Էֆենտի,- ըսի:

- Ուրեմն մէջ մը համբուրուեցէք տեսնեմ,- ըսաւ: Չպէտէն շուտով երեսը ինծի մօտեցուց, համբուրուեցանք: Նշանիդ շնորհաւոր ըլլայ,- ըսաւ:

- Պարտքս ի՞նչ է,- ըսի:

- Երեսուն սուրիական,- ըսաւ:

- Առանձին-առանձին քանի՞ Է,- հարցուց Չպէտէն: Ես վճարեցի, յետոյ ականջներուն Նայեցայ, ոսկերիչին ըսի՝

- Մեզի օղ ալ ցոյց տուր:- Օղ մըն ալ հաւնեցանք, տասը լիրա ալ ատոր վճարեցի, ելանք թէ-թէի քալեցինք քիչ մը, դարձեալ կառք նստանք, գացինք անուշաւաճառի խանութ մը, Նշանի շաքար, շոքոլա, փախլաւա եւ քոնիաք գնեցինք վերադարձանք տուն: Տունը տեսայ որ արդէն Սելիմ Էֆենտին եւ Հայկարամը սկսեր են կամաց-կամաց խմել:

Ոսկիները յանձնեցի Հայկարամին, որպէսզի Նշանտուքին ինքը հագցնէ, մենք ալ քոնիաքը սեղանին դրինք, իրենց միացանք, կենաց խմեցինք: Մէջ մըն ալ տեսանք՝ դրացիներու աղջիկները հաւաքուեցան սկսան *զլլիթի*, ծափ զարնելու եւ պարելու, Չպէտէն համբուրելու, շնորհաւորելու: Ժամը եղաւ ութը: Ըսի՝

- Երթամ ընկերներուս լուր տամ, վաղը Նշանին թող գան ետ, կու գամ:- Թաքսի մը առի գացի Բայաք, ընկերներս հրաւիրեցի Նշանտուքի, պայուսակս ալ հետս առի որ Նշանի ատեն քաղաքացիական քոսթիմ հագնիմ, Նոյն թաքսիով վերադարձայ: Եկայ ի՞նչ տեսնեմ՝ աղջիկներ ու կիներ կ'երգեն-կը պարեն, հարսանիք կ'ըլլայ:

Հագիւ Ներս մտայ աղջիկները գիս բռնեցին, համբուրեցին: Ես ինծի ըսի՝ «ասի տասը Էլմաստէն աւելի լաւ է»: Էլմաստը մոռցայ: Մինչեւ գիշերուան տասներկուրը քէֆ ըրինք: Ամէն մարդ տունը գնաց, Հայկարամը ու ես մնացինք: Հայկարամին ըսի՝

- Զալէ երթանք, այսօր ես ձեր հիւրը կ'ըլլամ մէկ օրուան համար:

- Դուն հոս մնա՛, քեզի համար անկողին ունինք,- ըսաւ Սելիմ Էֆենտին: Չիս չձգեցին որ Հայկարամին տունը երթամ: Հայկարամը եւ տիկինը ելան երթալու, ես դուրս ելայ Հայկարամին երեք ինչուն ոսկի տուի, ըսի՝

- Նայեցէք, ինչ որ պետք է ըրէք, դուք գիտէք այստեղի սովորութիւնները:

- Շատ լաւ,- ըսին ու գացին տուներին:

Ես մնացի Նշանածիս տունը: Ինծի սենեակ մը ցոյց տուին, Նշանածիս հետ միասին մտանք Ներս, անկողինը բացաւ ինծի ալ լաւ մը համբուրեց, դուռն ալ վրաս գոցեց գնաց: Ես պառկեցայ: Առտու ժամը եօթը եղեր էր սենեակէն դուրս ելայ Չպէտէն եկաւ շուր թափեց, ձեռքս-երեսս լուացի, նստանք կաթով սուրճ խմեցինք, քիչ ետք հայրը-մայրը արթնցան, անոնք ալ եկան սուրճ խմեցին, իրարու հետ կը խօսէինք: Ես լաւ արաբերէն չէի գիտեր բայց իրար կը հասկնայինք: Ժամը տասը եղաւ աղջիկները գալու սկսան: Հայկարամը, տիկինն ալ եկան, երկու կողովներով Ներս մտան, ըսին՝

- Ամէն ինչ պատրաստ է, Նուագախումբ ալ պիտի գայ ժամը երեքին:

Շար. Էջ 05

Եղեռնի Հետքերով - 20

Տեօրթնուցի Պենոն Վասիլեանի Յուշերը Չոր Մերճուման-Չորք Մարգպան

Սկիզբը էջ 04

Ընկերներս սկսան գալու: Ժամը երեք եղաւ, ամէն ինչ պատրաստ էր արդէն, նուագախումբը եկաւ սկսաւ նուագել: Մէյ մըն ալ տեսայ տերհայր մը եկաւ, ամէն մարդ ոտքի ելաւ: Ես ալ *սիւհի* հագուստս հագած էի, գացի տերհոր ձեռքը համբուրեցի, Չպէտէն մօտեցաւ տերհոր ձեռքը համբուրեց: Տերհայրը՝

- Ու՛ր են մատանիները, հոս բերեք,- ըսաւ: Հայկարամը մատանիները սեղանին վրայ դրաւ, տերհայրը աղօթքը ըրաւ, մենք երկուքս ոտքի կեցեր էինք, մեզի՝ ծունկի եկէք,- ըսաւ, գլուխնիս օրհնեց, դարձեալ աղօթք ըրաւ,- ոտքի՛ ելէք,- ըսաւ, մատանիները առաւ մէկը ինծի տուաւ մէկը Չպէտէին, ինծի ըսաւ՝ անցուր մատանին նշանածիդ,- աղջկան ալ նոյնպէս: Անցուցինք, գլուխնիս իրարու միացուց, խաչով ալ օրհնեց կէս պսակի պէս,- համբուրուեցէք,- ըսաւ, համբուրուեցանք, նուագախումբը սկսաւ նուագել, մարդիկ սկսան պարել, աղջիկները սկսան զինուորներուն փակիլ ու պարել, ես ու Չպէտէն նստած՝ պարողներուն կը դիտէինք, միքանի երիկ մարդիկ նստած կը խմէին, Չպէտէին հայրն ու մայրը իրարու հետ կը պարէին: Ես ինծի այնտեղ իշխանի պէս կը զգայի: Ես այս ուրախութիւնը մինչեւ այդ օրը չէի տեսած: Կէս գիշեր եղաւ, ժամը տասներկուքը անց, հարսնիքը վերջացաւ: Հայկարամին հարցուցի՝

- Նուագախումբին ի՞նչ պիտի տանք:

- Երեք լիրա տուածդ դրամին մէջն է: Պենոն, տերհայրը ձեզի կէս-պսակ ըրաւ, աղջիկը քեզի պիտի տան հետը կրնաս պառկիլ, ասոնց օրէնքը այսպէս է, հայտէ գիշեր բարի,- տիկինը առաւ գնաց: Մենք մնացինք: Ժամը եղաւ երկու: Աներս ըսաւ՝ «մենք ալ պառկինք»: Ես մտայ սենեակս, հանուեցայ, անկողին մտայ պառկեցայ, հինգ վայրկեան ետք Չպէտէն դուռը բացաւ ներս մտաւ դուռը ետ գոցեց, եկաւ անկողին մտաւ ինծի փաթեցուցաւ ժամերով իրարմէ չբաժնուեցանք Աստուծոյ կամքով:

Առաւօտ ժամը վեցին պէտք էր գորանոց ըլլայի: Գիտնալով որ կը պատժուիմ չերթալու պարագային, այդ առաւօտ չգացի: Ժամը երեքին գացի ներկայացայ *սերճան*ին եւ պարզեցի ուշանալուս պատճառը: *Սերճանը* զիս տարաւ քափիթանին մօտ, ըսաւ թէ Պենոնը ամուսնացեր է, այդ պատճառաւ առաւօտեան ճիշտ ժամուն չէ եկած, հիմա՝ ժամը երեքին եկաւ:

Քափիթանը զիս յանդիմանեց mon dieux, vous Arméniens. Huit jour- *սերճան*ին հարցուցի՝ «ի՞նչ կ'ըսէ»:

- Ուրթ օր բանտարկութիւն ունիս,- ըսաւ:

Ես շուարած՝ mon capitaine չձգեց ըսեմ՝

- Aller, aller ons,- ըսաւ *սերճանը* եւ սկսաւ խնդալ,- եկուր մի՛ կենար, գնա՛ր քեզի ուրթ օրուան արտօնագիր տուաւ:

Առի թուղթը, դուրս կայ, թաքսի մը առի ուղղակի Չահլէ գացի, տուն: Չպէտէին քով կերանք-խմեցինք պառկեցանք, երեք ժամ ետք ելանք, ժամը ութուկէսին թաքսի մը առինք գացինք *ուսառի*, սրճարան մը նստանք մեզի *մենթէ* բերին խմեցինք ժամ մը հոն մնացինք, յետոյ քալելով տուն վերադարձանք: Աներս տեսակաւոր համեղ ճաշեր պատրաստեր էր, Հայկարամը եւ տիկինը հրաւիրեր էր, սեղանը պատրաստ մեզ կը սպասէին: Չահլէի օդին բերին, կերանք-խմեցինք քե՛ք ըրինք: Հայկարամը սկսաւ պատմել Տեօրթ Եոյի մէջ իմ ըրածներս: Աներայրս ելաւ ինծի համբուրեց՝ «ուրեմն իմ փեսաս հերոս է եղեր» ըսաւ:

Ուրթ օր այսպէս իմ արձակուրդս վայելեցի, ամէն օր պտոյտ ու քե՛քերով: Ուրթերորդ օր առտու ժամը հինգին գացի պաշտօնիս ներկայացայ: Այդ օրէն ետք ամէն օր ժամը հինգին տուն կու գայի, առաւօտ ժամը վեցին ներկայ կ'ըլլայի գորանոց:

- Ես Բայաքէն տուն պիտի վարձեմ,- ըսի աներայրիս,- Չպէտէն հոն պիտի տանիմ:

- Դուն ի՞նչ կ'ըսես,- ըսաւ,- տար, բայց դուք պսակուած չէք: Պսակուէ վերջը տար:

- Շատ լաւ,- ըսի:

- Հարսանիք ընելու պէտք չկայ,- ըսաւ,- տերհայրը կու գայ, ձեզի կը կապէ, օրինական կինդ կ'ըլլայ, առ տար:

- Այդպէս կ'ըլլայ,- ըսի:

- Այո, կ'ըլլայ, դուք արդէն ամուսիններ եք: Նշանին հարսնիք ըրինք կը բաւէ,- ըսաւ:

1925 Օգոստոս տասնհինգին Աստուածածնայ տօնին օրը տերհայրը եկաւ,

թաղի աղջիկներ-կիներ հաւաքուեցան, տերհայրը մեզ պսակեց: Քե՛ք մըն ալ ըրինք, վերջացաւ: Ես Բայաքէն տուն մը վարձեցի վեց ամսուան համար, ինչ որ պէտք էր տունի համար՝ ամէն ինչ տուին, մենք գացինք Բայաք:

Ֆրանսացիները տիրազինեցին դէմ կը պատերազմին: 1925 Հոկտեմբեր քսանին մեր մօտ լիբանանցի արաբներու վաշտ մը կար զանոնք տարին ճակատ: Ինծի եւ իմ տասը զինուորներուս՝ ճակատ գացող զինուորներուն փոխարէն զինապահեստի պաշտօն տուին:

Բայաքի մէջ հինգ հայ ընտանիք կար, մէկը իմ մօրաքրոջս փեսան՝ Կիրակոս Աղազարեանն էր տեօրթնուցի, երկրորդը *քեպասպճի* Պեպէքն էր, մնացած երեք ընտանիքները չէի ճանչնար: Պաշտօն առնելուս ուրթերորդ օրն էր, փեսայ Կիրակոսը եկեր է, ուրֆացի Յովհաննէսին ըսեր է՝ մենք հոս հինգ հայ ընտանիքներ ենք, ֆրանսացիները եւ արաբները իրարու դէմ կը կռուին, թերեւս մեզ ալ կը խառնեն, մեզի հինգ հատ զէնք տուր որ մենք մեզ պաշտպանենք: Յովհաննէսը՝

- Ես դուռը բանալ չեմ գիտեր, Սմբատը տես,- ըսեր է: Կիրակոսը գացեր Սմբատին ըսեր է: Սմբատն ալ՝

- Չէնքերու դռան առաջ Պենոնն է պառկողը, ես այդպիսի բան չեմ կրնար ընել,- ըսեր է:

Յովհաննէսը քովս եկաւ, նոյն բաները ինծի ըսաւ:

- Փեսայ, ինծմէ զէնք մի՛ ուզեր, ուրիշ ինչ որ ուզես՝ տամ, բայց զէնք չեմ կրնար տալ:- Աղաչեց-պաղատեցաւ՝ չեմ կրնար ըսի:- Ինծմէ չիրաժարեցաւ, եկաւ-գնաց տակնուվրայ ըրաւ, ձանձրացուց: Վերջաւորութեան զիս խաբեց, ըսի՝ տամ ալ վերջանամ: Դուռը արդէն բանալի չունէր, հանեցի հինգ զէնքեր եւ հինգ գօտի փամփուշտ տուի, առաւ գնաց:

Այս անաստուածը եւ իր ընկեր սիսեցի Խորենը զէնքերը կը տանին ծախելու որո՞ւ՞ ֆրանսական լրտես Հապիպ Թահուկին: Կեսօրին կ'երթան լրտեսին Չահլէի տունը: Լրտեսը կ'ըսէ «հիմա քովս պատրաստ դրամ չունիմ, վաղը կ'եսօրին, պատահ մը հաց կ'ուտենք դրամն ալ պատրաստ կ'ըլլայ»: Այս անպետքները յաջորդ կ'եսօրին կ'երթան, մարդը սեղանը դրեր է օդին ալ պատրաստ իրենց կը սպասէ: Ներս կը մտնեն կը նստին, հազիւ բաժակ մը կը խմեն միլիթերները ներս կը խուժեն, այս երեքը կը ձերբակալեն ու կը տանին բանտ: Հարցաքննութիւն կ'ըլլայ՝ ու՛րկէ առիք այս զէնքերը, ո՛վ ձեզի տուաւ... Կիրակոսը՝ կ'ըսէ Պենոնը եւ Յովհաննէսը տուին:

Միլիթերները այս անճարակները Չահլէէն Բայաքի բանտը կը բերեն, լրտեսն ալ միասին: Ան ալ ձերբակալուած, բայց ձեւակաւ: Մենք իրիկուան ընթրիք կ'ընէինք, երկու միլիթերներ եկան՝ Պենոնը ո՛վ է ըսին:

- Ես եմ,- ըսի, բայց գիտցայ ի՞նչ ըրեր էին:

- Յովհաննէսը ո՛վ է,- ըսին:

- Ես եմ ըսաւ:

Մեզ ձերբակալեցին, տարին բանտ: Հոն տեսանք երեքը նստած էին: Ես միայն Կիրակոսը կը ճանչնայի: Կիրակոսին հարցուցին՝ ասո՞նք տուին զէնքերը, «այո» ըսաւ:

Չիս եւ Յովհաննէսը տարին իրենց կեդրոնը, միլիթերները զիս լաւ մը ծեծեցին խարազանով: Այնքան ծեծեցին որ յոգնեցան ու կեցան: Ես՝ «Ես չեմ տուողը» ըսի ու իմ «ոչ»ին վրայ մնացի: Ատոր համար զիս ծեծեցին եւ տասը տարի բանտարկութիւն տուին:

Ես շատ ճահիլութիւն ըրի: Եթէ ճիշտը խոստովանեի՝ ինծի տասը տարի բանտարկութիւն չէին տար:

Կարգը եկաւ Յովհաննէսին: Յովհաննէսին մէկ հատ զարկին՝

- Կեցէք, ես կ'ըսեմ,- ըսաւ,- Կիրակոսը եկաւ ինծմէ ուզեց, ես չեմ գիտեր Սմբատը գիտէ ըսի: Սմբատին գացեր է Սմբատն ալ Պենոնին դրկեր է,- ըսաւ:

Սմբատին հարցաքննութիւն կ'ընեն՝ ան ալ «Ես բանէ մը լուր չունիմ» կ'ըսէ: Անոր ալ լաւ մը կը ծեծեն, բայց ան ալ ճիշտը չ'ըսեր: Իմ վրաս դրամ չկար, իմ ունեցած դրամն ես Չպէտէին տուեր էի: Մեզ տարին օդակայան, ամէն մէկս առանձին փոքր խցիկներու մէջ բանտարկեցին, յաջորդ օրը դարձեալ մեզ առանձին-առանձին հարցաքննեցին: Քսան օր հոն բանտարկուած մնալէ ետք մեր հինգը շոգեկառք դրին տարին Պէյրութ զինուորական բանտ յանձնեցին:

Բայաքէն դէպի Պէյրութ շոգեկառք ելլելու ատեն Չպէտէն եկեր էր որ զիս տեսնէ, հետս խօսի: Միլիթերները չձգեցին որ մօտենայ ինծի, եւ այդպէս հեռացանք մենք իրար նայելով:

Շաբ. յաջորդ թիւով

Մարդո՞ւն թե Աստուծո՞յ Թագաւորութիւնը

ԴՈԿՏ. ԶՐԱՅՐ ԾԵՂԵԾԵԱՆ

«Ժամանակը լրացած է եւ Աստուծոյ թագաւորութիւնը մօտեցած է. ապաշխարհեցէք ու աւետարանին հաւատացէք» (Մարկոս 1:15)

*«Հարստահարութեան մի յուսաք
Յափշտակութեան վրայ փուճ յոյս մի դնէք
Հարստութիւնը եթէ շատնայ
Սրտերնիդ թող չվստահի անոր» (Սաղմոս 62:10)*

«Նոյնպէս ալ Զրիստոս մէկ անգամ պատարագ մատուցուեցաւ՝ շատերուն մեղքերը վերցնելու համար, բայց երկրորդ անգամին առանց մեղքի պիտի յայտնուի փրկութեան համար անոնց՝ որոնք անոր կը սպասեն» (Թուղթ առ Եբրայեցիս 9:28)

Աստուածաշունչի Մարկոսի Աւետարանը կը ներկայացնէ քրիստոնեային կեանքը, որ կը պարփակէ չարչարանք՝ յար եւ սման Զրիստոսի, երբ ան խաչին վրայ տանջուեցաւ եւ մահացաւ: Մարկոս աւետարանիչ այս իմաստով կը կամրջէ քրիստոնեային կեանքը Զրիստոսի աշխարհի վրայ ապրած իրականութեան հետ: Վեր առնենք Մարկոս աւետարանիչին պատմական ենթահողը աւելի լաւ ընկալելու իր աւետարանին միտք բանին:

Մարկոս աւետարանիչ կը խօսէր քրիստոնեայ հաւաքականութեան, որ կ'ապրէր Հռոմի Ներոն կայսրի օրերուն: Պատմութեան տուեալները ցոյց կուտան, թէ ինչպէս Ներոն չարչարանքի ենթարկեց քրիստոնեաները իր իշխանութեան օրերուն: Մարկոս աւետարանիչ եթէ մէկ կողմէ կը ներկայացնէ քրիստոնեային չարչարանքի կեանքը, բայց նաեւ կը քաջալերէ քրիստոնեան տոկայութեամբ եւ դիմադրելու համար այդ դժուար ժամանակը:

Ան Զրիստոսի չարչարանք-քաջալերանք իրականութիւնը կը զարգացնէ եւ որ կը յատկանշուի որպէս «սպասաւոր-Մեսիա»: Զրիստոս աշխարհի եկաւ ոչ թէ «սպասաւորութիւն ընդունելու՝ այլ ընելու» (Մատթեոս 20:28): Զրիստոսի սպասաւորութիւնը մարդկութեան եւ աշխարհին համար է: Կերտել կեանք մը ի սպաս մարդկութեան եւ աշխարհին, որ լաւ է ու բարի: Նաեւ շնորհել մարդուն կեանք մը, որ կու գայ Զրիստոս-Մեսիայէն, որ կը բնորոշուի որպէս թագաւորութիւն, որ ժամանակաւոր չէ: Այլ կ'անցնի ժամանակի եւ պատմութեան սահմանները եւ կը մնայ տոկուն, պիտանի եւ յաւիտեան: Այս կը շնորհէ մարդուն արժեքի գիտակցութեամբ լեցուն կեանք մը, որ կը քաջալերէ զինք ապրելու նոյնիսկ երբ դժուար են պայմանները եւ կը տանի անձը յաւիտեանականութեան:

Մարկոս աւետարանիչ կը ներկայացնէ այս ճամբան, որ Զրիստոս մեկնարկեց եւ ուր պիտի ամբողջացներ եւ նաեւ կերտէր Աստուծոյ շնորհած այս կեանքի թագաւորութիւնը:

Այսպէս:

«Յովհաննէսին մատնուելէն յետոյ» (Մարկոս 1:14): Մատնուիլը արդէն կը բնորոշէ չարչարանք: Մատնուելով ու տակաւին ձեռքակալուելով եւ բանտը նետուելով Զրիստոս իր վրայ առաւ Յովհաննէս Մկրտիչին չարչարանքը:

Կայ նաեւ աշխարհագրական տուեալը, որ նոյնքան իրական է. «Յիսուս Գալիլիա գալով» (Մարկոս 1:14): Գալիլիան Զրիստոսի քաղաքն էր եւ որ նաեւ դարձաւ իր առաքելութեան կեդրոնը: Աշխարհագրական տուեալը յատկանշական է այս իմաստով, որ Զրիստոս իր թագաւորութեան հիմքը դրաւ հողին՝ երկրին վրայ: Հողին հետ առնչուիլը ցոյց կուտայ Զրիստոսի շնորհած թագաւորութեան իրականութիւնը:

Զրիստոս իր թագաւորութիւնը սկսաւ «քարոզելով» (Մարկոս 1:14): Քարոզելը ներգործական բայ է, որ կը նշանակէ հռչակել, աւետարանել, տարածել, «խօսքով ու գիրով որեւէ գաղափարաբանութիւն՝ հաւատք եւ այլն տարածել» (Հայոց լեզուի նոր բառարան, Պէյրութ): Այս իմաստով եթէ քարոզելու մէջ կայ տարածել բայց կայ նաեւ գաղափարաբանութեան հասկացողութիւնը: Այս պարագային Զրիստոսի թագաւորութեան գաղափարաբանութիւնը, որը նոր կեանքն է: Հոն, ուր մարդ կը հաշտուի Աստուծոյ հետ եւ իր կեանքը կը վերաշինուի եւ կը վերափոխուի Աստուծոյ պատկերին: Այն պատկերը որ Բարի է: Աստուծոյ հիմնած թագաւորութեան հիմքը սկսաւ աշխարհին մէջ բայց հոն չի մնաց:

Կայ երկրային թագաւորութիւնը: Աշխարհին համար ստեղծեց իր՝ Աստուծոյ, թագաւորութիւնը: Այս թագաւորութեան ազդանշանը տուաւ, երբ Զրիստոս կանչեց իր առաջին աշակերտներէն Սիմոն եւ եղբայրը Անդրեասը ըսելով. «Իմ ետեւէս եկէք» (Մարկոս 1:17): Ու տակաւին յառաջ

երթալով տեսաւ Չեբեթեան Յակոբոսը եւ եղբայրը Յովհաննէս եւ «զանոնք ալ կանչեց» (Մարկոս 1:20): Զրիստոս կանչեց աշակերտները, փոխեց-վերաշինեց այս աշակերտները, եւ անոնց տուաւ կարեւոր առաքելութիւն մը. «ձեզ մարդոց որսորդ պիտի ընեմ» (Մարկոս 1:17): Անոնք՝ աշակերտները, կերտեցին Աստուծոյ թագաւորութիւնը



աշխարհի վրայ: «Մարդոց որսորդ» հասկացողութիւնը պիտի հասկնալ այս ենթահողին մէջէն: Թէ Զրիստոս փոխեց աշակերտները, որոնք փոխեցին աշխարհը: Զրիստոս իր մահուամբ եւ յարութեամբ հիմը դրաւ Աստուծոյ թագաւորութեան: Աստուծոյ թագաւորութիւնը նոր կեանքն է, որ Զրիստոս շնորհեց բոլոր մարդկութեան: Եկեղեցի բացատրութիւնը իր ընդհանրական հասկացողութեան մէջէն Աստուծոյ թագաւորութիւնն է աշխարհի վրայ, որուն առաքելութիւնն է դառնալ «մարդոց որսորդ» նոյն թագաւորութեան համար:

Կեանքի տարբեր ժամանակահատուածներուն մէջ կայ բախումը: Բախումը մարդուն եւ Աստուծոյ թագաւորութիւններուն միջեւ: Մարդկային արժեքները կը հարստահարուին, իրաւունքներ կը յափշտակուին եւ ապօրինի հարստութիւններ կը դիզուին: Մարդը կը շարունակէ «վստահիլ իր սրտին կանչին» (Սաղմոս 62:10): Եթէ ակնարկ մը նետենք աշխարհի քաղաքական, տնտեսական եւ ընկերային տարբեր ոլորտներուն, պիտի տեսնենք, թէ տակաւին առկայ է տագնապը, ճգնաժամերը, հիւանդութիւն, պատերազմ, անարդարութիւն ու տակաւին: Աշխարհ կը շարունակէ մնալ անապահով: Եւ մարդկութիւնը կը շարունակէ փնտռել բարօր, ապահով եւ խաղաղ կեանք: Աշխարհ կը փորձէ իր արժեքափէրը ստեղծել եւ հիմնաւորել ստեղծելու իր ապահովութիւնը այդ բոլորին մէջէն:

Ապահովութիւնը կարելի է ստեղծել եթէ նոյն մարդը կողմնորոշուի եւ ընէ ճիշդ ընտրութիւնը:

Իսկ ընտրութիւնը:

Աստուծոյ թագաւորութիւնն է: Հոն ուր մարդկութիւնը կը հաշտուի Աստուծոյ հետ եւ դարձեալ կը տիրանայ Աստուծոյ պատկերին: Մարդը կը փոխուի, կը վերաշինուի եւ կը սկսի փոխել-վերաշինել իր շրջապատը, հաւաքականութիւնը, երկիրը: Եւ նոյն մարդը կը սկսի ամրապնդել Աստուծոյ թագաւորութիւնը ու կը դառնայ «մարդու որսորդ», ստեղծելով Աստուծոյ թագաւորութիւնը իր անմիջական աշխարհագրական տեղին մէջ՝ իմա Գալիլիա: Իւրաքանչիւր մարդ կ'ապրի ու կը գործէ իր Գալիլիային մէջ: Եթէ աշխարհ մը պիտի ստեղծենք, ուր կայ բարօրութիւն եւ համակեցութիւն, անհրաժեշտ է, որ կերտենք իւրաքանչիւրս մեր Գալիլիաները:

Երկնային թագաւորութիւնը կ'երաշխաւորէ քրիստոնեային ապահովութիւնը: Ապահովութիւնը ուր Աստուծոյ թագաւորութիւնը կ'անցնի տուեալ աշխարհագրական երկրի ու հողի սահմանները: Ու տակաւին կ'անցնի բոլոր ժամանակահատուածները եւ կը դառնայ յաւիտեան: Այս իրականացաւ Զրիստոսի մահուամբ եւ յարութեամբ: Ան՝ Բարին, յաղթեց չարին՝ մեղքին, մահուան: Եւ յաղթելով բարձրացաւ «ոչ թէ ձեռագործ սրբարան» (Թուղթ Առ Եբրայեցիս 9:24) իմա մարդուն կողմէ եւ անոր միջոցաւ շինուած թագաւորութիւն մը: Այլ գնաց «բուն երկինքը»՝ իմա Աստուծոյ կողմէ շինուած եւ կերտուած թագաւորութիւնը: Ան գնաց հոն «որպէսզի մեզի համար Աստուծոյ առջեւ ներկայանայ» (Թուղթ Առ Եբրայեցիս 9:24): Այս է Աստուծոյ թագաւորութեան շնորհած ապահովութիւնը:

Երկնային թագաւորութեան մէջ կայ նոյնպէս խոստումը:

Թէ Զրիստոս մէկ անգամ չարչարուեցաւ աշխարհի վրայ: Մենք ալ իր թագաւորութեան անդամները կը չարչարուինք աշխարհի մէջ նոյն այս «մէկ անգամի» հասկացողութեան մէջէն: Բայց կայ իրականութիւն մը, որ անսասան է եւ որ կարելի չէ փոխուի: Թէ Զրիստոս երկրորդ անգամ առանց չարչարանքի պիտի յայտնուի. «փրկութեան համար անոնց որոնք անոր կը սպասեն» (Թուղթ Առ Եբրայեցիս 9:28): Հոն չարչարանք չիկայ: Այս է Աստուծոյ երկնային թագաւորութեան խոստումը:

Իսկ թէ ո՞վ են անոնք, որոնք «Անոր կը սպասեն»:

Ե՞ս, դո՞ւն, մե՞նք: Հա՞յր: Ու տակաւին աշխարհ:

Հինք սպասող(ներ)ը անոնք են, որոնք կրնան ընել ճիշդ ընտրութիւնը:

Մարդո՞ւն թե Աստուծո՞յ թագաւորութիւնը:

Հեռանալ Բացասական Մարդոցմէ

ՊԻԱՆՔԱ ՍԱՐԸԱՍԼԱՆ

«Անձնական զարգացման» գիրքերու կամ ընկերային ցանցերու վրայ յաճախ կը տեսնենք «բացասական մարդոցմէ հեռացէ՛ք» առաջարկը: Արդեօք այս լա՛ւ խորհուրդ մըն է:

Ըստ գերմանացի փիլիսոփայ Թեոտոր Ատորնոյի, դրամատիքութիւնը կ'արտադրէ տարատեսակ բնաւորութիւն եւ ոճ այնքան, որքան գործարաններու մէջ կ'արտադրուին տարատեսակ ապրանքներ: Համակարգերու մեքանիզմներու համահունչ մարդոց բնաւորութիւն եւ կեանքի փիլիսոփայութիւն տալը դրամատիքութեան հիմնական նպատակն է:

«Գովազդներու մէջ իւրաքանչիւր ապրանքի ներկայացումը շատ երջանիկ ընկերներու կամ ընտանիքի հետ՝ ձեռով մը «ծանուցումն» է կարօտը «ընկերականութեան» նկատմամբ, ինչ որ խլուած է պաստառի դիմաց գտնուողներու ձեռքերէն», կ'ըսէ Ատորնո: Կրթութենէն յետոյ, այս նոր յարաբերութիւններու ստեղծման ամենաարդիւնատէր սարքն է հեռատեսիլը, ձայնասփիւռը ու մանաւանդ՝ համացանցը:

Դրամատիքութեան ամենամեծ վախն է՝ աշխատող ժողովուրդի աշխատանքային ժամերէն դուրս այլոց հետ յարաբերութիւններ հաստատելն ու շփման մէջ մտաւոր, քանի որ մարդկային բնութիւնը կառուցուած է համախմբուելու եւ ի վերջոյ՝ կազմակերպուելու: Որպէսզի մարդիկ չհաւաքուին՝ աշխատանքային ժամերէն դուրս յարաբերութիւններ զարգացնելու համար, միշտ կան «սահմանաւորումներ», որոնք կը խոչընդոտեն «համախմբուիլը»: Ինչպէս՝ աշխատանքային ժամերու աւելացումը, աշխատատեղերու ժամանցի վայրերէն հեռացումը, ցած աշխատավարձով ընկերային յարաբերութիւնները «շքեղութեան» մակարդակին բարձրացնելը...

Ֆրանսացի փիլիսոփայ Ալէն Դատիւ մարդկային յարաբերութիւններու վրայ դրամատիքութեան ազդեցութեան մասին իր ելոյթին մէջ ըսած է. «Եթէ դրամատիքութենէն առաջ կօշիկ մը ունէիք, վնասուելէն ետք կը վերանորոգէիք զայն: Զէիք կրնար թափել, փոխել կամ հեշտութեամբ վերադարձնել: Այդ ժամանակ մարդկային յարաբերութիւններն ալ նման էին: Անոնք հիմնուած էին վերանորոգման վրայ: Յետդրամատիքական ժամանակաշրջանին կը գերիշխէ փոխարինում-վերադարձ-թափել ձեւաչափը: Այլեւս նոյնն են յարաբերութիւնները՝ վերադարձ, փոխարինում եւ թափում: Վերանորոգման ջանք չկայ»: Սա մեզի պարտադրուած է «առողջ եւ որակեալ կեանքի» մասին շարք մը խօսակցութիւններով, ուսուցումներով եւ առաջարկներով: Օրինակ՝ նայի՛ք մարդկային յարաբերութիւններու վերաբերեալ խորհուրդներ պարունակող յօդուածներու: Տասն յօդուածէն առնուազն ութը կը վերաբերին հաղորդակցութեան բացակայութեան կամ յարաբերութիւններու պակասի: Ա՛յս է դրամատիքութեան ուժը. այդ կրնայ մարդիկ համոզել, թէ ձեր ձեռքի եւ ոտքի շղթաները աւելի որակաւոր տեսք կրնան ունենալ՝ փայլեցնելով զանոնք:

«Հեռացուցէք բացասական մարդիկը ձեր կեանքէն»ը հիմնադր խորհուրդ է, բայց պէտք է հասկնալ, թէ ո՞վ է բացասական մարդը: Ընկեր մը, որ ձեզ դրականօրէն կը քննադատէ, բացասական չէ: Այն մարդը, որ կը զգայ խնդիրը, կը տեսնէ եւ կ'ուղղէ ծրագրի մը ռազմավարութիւնը, բացասական չէ: Բարեկամ մը, որ կը համարձակի



վիճիլ եւ հակադրուիլ մեզի՝ երբ իրաւունք ունի, բացասական չէ: Բացասականը այստեղ թունաւոր մարդն է, որ ելք չ'առաջարկէր, յուսահատութիւն կը սերմանէ ու ուրախութիւն կը զգայ ուրիշներու ձախողումներով:

Մարդոց մեծամասնութիւնը, որ կը նկարագրենք որպէս բացասական, կրնան ըլլալ անմեղ անհատներ, որոնք բախուած են բազմաթիւ ցաւերու իրենց մանկութեան կամ իրենց կեանքի որեւէ փուլին, անոնց փորձառութիւնը անտեսուած են, եկթարկուած են հոգեբանական ճնշման ու յայտնուած են բացասական մտքերու մէջ՝ առանց վնաս պատճառելու հասարակութեան: Անոնցմէ շատեր առհասարակ նիւթական դժուարութիւններու պատճառով չեն կրցած իրենք զիրենք բուժելու հնարաւորութիւն գտնել: Այսինքն այն փաստը՝ որ մարդը «բացասական անձնաւորութիւն» պիտակը կը ստանայ միայն իր կրած վնասներու կամ անհնարութիւններու պատճառով, պէտք չէ բացառել զայն, օտարել կամ նոյնիսկ մեկուսացնել: Որքան կը դիտարկեմ, աննրբանկատ կամ անազնիւ մարդիկ ընկերային ցանցերու վրայ կը փորձեն «սիրոյ թիթեռնիկի» տեսք ունենալ եւ ըսել՝ «բացասական մարդիկը պէտք է հեռացնել հասարակութենէն», անոնք «ուշադրութեան յիմարութեան» մէջ են: Կը կարծեմ, թէ այսքան զգուշիկ ըլլալն ու այդ թոյլը հասարակութեան մէջ սերմանել փորձելը՝ մարդկութեան ամենամեծ ամօթներէն մին է:

Մենք այսօր հասած ենք այն կետին, ուր «անբարենպաստ ազդեցիկներ» սխալ կը ճանչցուին: Բացասական մարդոց հասարակաց առանձնայատկութիւններէն մէկը բողոքելը ապրելակերպ դարձնելն է: Բոլորս կրնանք բողոքել որոշ բաներէ, ինչ որ մեր ամենաբնական իրաւունքն է: Այնուամենայնիւ, եթէ չափը անցնենք եւ մեր դժգոհութիւնը աճի ամէն օր, մեզի համար աւելի դժուար կ'ըլլայ յառաջընթաց արձանագրել: Բողոքելը նպատակները կատարելագործելէ եւ պատասխանատուութենէ խուսափելու միջոց մըն է: Մենք զմեզ այլ մարդոց հետ համեմատելը շատ բացասական վերաբերմունք է: Սա կը նշանակէ անձնական նկարագրի բացակայութիւն: Մարդիկ՝ որոնք ակրեսիւ կերպով ինքզինքնին կը բաղդատեն այլ մարդոց հետ, ակրեսիւ վերաբերմունք կը ցուցաբերեն նաեւ այն մարդոց նկատմամբ, որոնց հետ կը բաղդատեն իրենք զիրենք եւ կը փորձեն տապալել զանոնք: Անոնք երջանիկ են ուրիշներու դժբախտութիւններով:

Երբ կը փորձենք իրականացնել մեր երազները՝ մեր ճանապարհին յայտնուած առաջին իսկ խոչընդոտին մեր նպատակէն հրաժարիլը, ի հարկէ, բացասական ըլլալու աղբիւրն է: Ինչպէս մենք պէտք չէ մեր առջեւ դնենք անհնարին նպատակներ, այնպէս ալ պէտք չէ հրաժարիլք մեր նպատակներուն հասնելու մեր ջանքերէն: Յիշենք, իւրաքանչիւր յաջողութիւն կը պահանջէ ջանք: Այնուամենայնիւ, պէտք չէ շեղիլ իրատեսական նպատակներէն: Նահանջելը, յանձնուիլը միշտ պարտուած կը զգացնէ, իսկ փորձելը՝ ուժեղ: Եթէ «բացասական մարդոցմէ հեռանալ» ուզենք, պէտք է գիտնալ, թէ ո՞րն է բացասականը:

ԲԱՆ ՈՒ ԳԻՐ

Երկու Ուրուական

Ես եմ, դու ես, ես ու դու
Գիշերում այս դիւթական,
Մենք մենակ ենք,— ես ու դու,
Ես էլ դու եմ՝ ես չըկամ...

Չըկան օրերն ահարկու,
Չըկայ ժամ ու ժամանակ,
Ուրուական ենք մենք երկու
Միշտ իրար հետ, միշտ մենակ...

Մոռացել ենք անցեալում
Տրտունը, թախիծ ու խաւար. —
Մի ուրիշ լոյս է ցոլում
Մեղմ ու անուշ մեզ համար...

Ես եմ, դու ես, ես ու դու
Գիշերում այս դիւթական,
Մենք մենակ ենք — ես ու դու,
Ես էլ դու եմ՝ ես չըկամ...

ՎԱՀԱՆ ՏԵՐԵԱՆ

ՄՇԱԿՈՒԹԱՅԻՆ ՕՐԱՅՈՅՑ

15 2022
ՅՈՒՆՈՒԱՐ

Կրկ Երկ Երբ Զրբ Հնգ Ուրբ Ծբթ

						1
2	3	4	5	6	7	8
9	10	11	12	13	14	15
16	17	18	19	20	21	22
23	24	25	26	27	28	29
30	31					



ՍԱՐԳԻՍ ԱԼԵՔՍԱՆԵԱՆ
(1910 – 1942)
«Աղջկայ դիմանկար»

Մարզական

ՀԲԸՄ-ՅԵԸ-ի Անդրանիկ Պաքերթյուի Խումբը Պարտութեան Մատնեց Աղիւսակը Գլխաւորող Տինամո Խումբը



Լիբանանի Պաքերթյուի Ֆետերասիոնի կազմակերպած տղոց Ա. դասակարգի մրցաշարներուն՝ տասներորդ խաղին ընթացքին, ՅԵԸ Անդրանիկ Պաքերթյուի Խումբը՝ Երկուշաբթի 10 Յունուար 2022-ի երեկոյեան, Նուհատ Նաուֆալ մարզադաշտին վրայ անակնկալօրէն եւ բոցաշունչ յաղթանակով պարտութեան մատնեց՝ 9 խաղ յաղթանակ տարած եւ խմբակին Ա. դիրքը գրաւող Տինամո Խումբին՝ 90-80, (կիսաւարտ 51-29) արդիւնքով, ներկայիս գրաւելով խմբակին 2-րդ պատուաբեր դիրքը:

Սոյն մրցաշարքի երթի 10 մրցումները ավարտած են, մեր հաշուին ունենալով 7 յաղթութիւն եւ 3 պարտութիւն:

Այս առիթով, ջերմօրէն կը շնորհաւորենք խումբին մարզիչ Ժորժ Տադերը, ինչպէս նաեւ Պաքերթյուի վարչութեան ատենապետ ՏԵՄԻտ Ճնթոյեանը եւ խումբին պատասխանատու Թոնի Ճնթոյեանը իրենց անխոնջ եւ տքնաջան աշխատանքին, որոնք ջանք եւ ճիգ չխնայեցին խումբին հեզասահ յաջողութեան համար:

Անխափան վերելք, յաջողութիւն եւ նորանոր նուաճումներ կը մաղթենք ՅԵԸ-ի Անդրանիկ տղոց խումբին:

ՅԵԸ-ի Մամլոյ Գրասենեակ

ՀԲԸՄ-ՅԵԸ-ի 18Էն վար Պաքերթյուի Լիբանանի Տարիքային Ախոյեանութեան Տղոց եւ Աղջկանց Ա. Փուլի Պատուաբեր Յաղթանակները

Կիրակի, 9 Յունուար 2022-ին «Զահրապա»-ի մարզադաշտին վրայ ավարտեցաւ Լիբանանի Պաքերթյուի Ֆետերասիոնի կազմակերպած 18 տարեկանէն վար տղոց եւ աղջկանց տարիքային ախոյեանութեան Ա. Փուլի մրցաշարքը: Յիշեցնենք, թէ ՅԵԸ Անդրանիկ Անթիլիաս կը մասնակցի տղոց ախոյեանութեան մրցումներուն, իսկ ՅԵԸ Անդրանիկ Սին Էլ Ֆիլ՝ աղջկանց:



Սոյն մրցաշարքերուն ՀԲԸՄ-ՅԵԸ Անդրանիկի 18 տարեկանէն վար տղոց եւ աղջկանց Խումբերը ավարտեցին Ա. Փուլի մրցումները առանց պարտութեան, արժանացան պատուաբեր արդիւնքներու եւ գլխաւորեցին իրենց խմբակներու աղիւսակին Ա. դիրքը:



Այս առիթով ջերմապէս կը շնորհաւորենք զոյգ խումբերուն մարզիչները. տղոց կազմի մարզիչ՝ Էլիաս Մուաւաթը, վարչական պատասխանատու՝ տղթ. Ռաֆֆի Զուլֆէանը եւ խմբապետ՝ Արման Զերչեանը, ինչպէս նաեւ աղջկանց կազմի մարզիչ՝ Զիլպեր Սալիպան, վարչական պատասխանատու՝ Նայիրի Սուէյտի – Զայրապետեանը եւ խմբապետուհի՝ Էրիքա Խուրին: Կը մաղթենք զոյգ խումբերուն նորանոր նուաճումներ ապագայ փուլերուն:

Դաւանելով ռամկավար եւ ազատական սկզբունքներ, կը հաւատանք բազմակարծութեան եւ ազատ խօսքի իրաւունքի: Դետեաբար՝ թերթիս մէջ հրատարակուած գրութիւնները անպայման չեն արտայայտեր խմբագրութեան տեսակետը: Կամքէ անկախ սարդած վրիպակներու պարագային, կ'ապաւինինք յօդուածագիրներուն եւ մեր ընթերցողներուն ներողամտութեան:

PLEASE JOIN US IN

Celebrating

THE LIFE OF

DR. GARBIS DER-YEGHIAYAN

MARCH 29, 1949 - JANUARY 11, 2021 - ETERNITY

SATURDAY
JANUARY 15, 2022
10 AM - 1:30 PM
SERVICE & RECEPTION

PASADENA FIRST CHURCH
OF THE NAZARENE
3700 E. SIERRA MADRE BLVD.
PASADENA, CA 91107

MASKS ARE REQUIRED